

Lazaro Erckern / weicläufftig vnd sehr außführlich
 geschehen / also daß ich ihre Schrifften (in Testen
 vnd Cupellen machen) nit zu verbessern weiß / son-
 dern den Liebhabern an solche Auctores will gewie-
 sen haben / darinn ein jedweder trewlichen vnter-
 richt / zu gutem contentement / finden wirdt: Doch
 seynd noch besondere Testen zu machen / davon viel-
 leicht noch wenige wissen / vnd ganz nit gemein
 seyn / darauff sich das Blei im abreiben veredelt /
 wann es wieder darauß geschmolzen wirdt; davon
 allhier nicht zu sagen / sondern der Zeit vnd Fortun
 soll vohr behalten bleiben.

CAPUT IX.

Vom glasuren der irdenen Instrumen-
 ten / davon im ersten vnd andern
 Theil gedacht worden.

W Eiln man nicht allenthalben gute Glas-hüt-
 ten / seine Instrumenten / zum ersten Ofen
 gehörig / zu machen / haben kan; also erfordert die
 Noht / daß man solche von Erden mache / vnd her-
 nach wol verglasure / vnd sind dann bißweilen diese
 von Erden besser / als Gläsernen zu gebrauchen /
 sonderlich / wann sie von guter Erden / welche die
 Spiritus nit einschlucket / gebrandt seyn; wie dann
 solcher Erden / welche sich in ein steinicht Wesen
 brennen läßt / allenthalben genug gefunden wirdt /
 vnd mangelt nur allein an der Erfahrenheit / solche